
Фарғона вилояти ҳокимлиги Ахборот хизмати раҳбари М.Обидовнинг БАЁНОТИ

Ҳурматли юртдошлар!

Барчангизни кириб келаётган янги, 2020 йил билан табриклайман. Янги йил ватанимиз равнақи, халқимиз фаровонлиги, адолат, холислик, тил ва дил бирлиги ҳамда одоб йили бўлсин.

Ўзбекистон Прокуратурасининг Фарғона вилояти ҳокими Ш.Ғаниев ҳақидаги Баёнотидан сўнг интернет сайтлари, ижтимоий тармоқларда ҳокимлик Ахборот хизмати раҳбари сифатида мени муҳокама қилиш авж олди. Шу юзасидан қуйидагиларни билдираман.

Биринчидан, Фарғона вилояти ҳокимлиги Ахборот хизматининг Баёноти муайян шахс, ушбу ҳолатда М.Обидовнинг эмас, ўз номи билан айтилганидек, ҳокимлик муносабатидир.

Иккинчидан, Ш.Ғаниевники деб таъкидланаётган овоз 2 декабрда ёзиб олингани иддао қилинади. Шу куни камина Исроилда, хизмат сафарида эдим ва табиийки, Ахборот хизматининг Баёноти ҳокимлик маълумотига асосланган.

Учинчидан, “Озодлик” тарқатган Ш.Ғаниевники деб таъкидланаётган аудиоёзувдаги овозда на “блогер” деган сўз бор, на “тахдидли ибора” бирон бир блогерга нисбатан йўналтирилмаган. Шунга қарамай, “Озодлик” мақола сарлавҳасига “Фарғона ҳокими блогернинг “жанозасини ўқиш”ни буюрди”, деган ёлғон сўзларни чиқарди. Ҳокимлик Ахборот хизмати Баёноти эълон қилишда “Озодлик”нинг илгари ҳам, айти шу ҳолатда ҳам ноҳолис ёндошуви ва сохтагарчилик қилаётгани инобатга олинган.

Қолаверса, Ш.Ғаниевни узоқ йиллардан буён таниб-билганларга маълумки, у бирон бир муаммо тўлиқ ҳал бўлдими, демоқчи бўлганида баъзан “муаммонинг жанозаси ўқилдими” деган иборани ҳам ишлатиб туради. Лекин бу иборани аниқ шахсга нисбатан ишлатганини эшитмаганман. Шунинг учун “Озодлик” Ш.Ғаниевнинг овози деб тарқатган аудиоёзувдаги ибора газ ёки электр муаммоси ҳал этилдими, деган маънода билдирилган бўлиши ҳам мумкин.

Мен умр бўйи журналистика билан яшадим, илгари бирон кун ҳам ҳокимият ёки давлат бошқаруви идораларида ишламаганман. Менинг истеъфоимни кутаётганларга айтмоқчиманки, ҳеч қачон ҳокимликнинг Ахборот хизматига “ёпишиб” олганим йўқ. Фаолиятимдан қониқмаган иш берувчи истаган вақтда меҳнат шартномасини бекор қилиши мумкин.

Янги йилни ҳуш кайфиятда кутиб олишингизни тилайман.

Фарғона вилояти ҳокимлиги Ахборот хизмати.

2019-12-30 19:07:23